



Inatsisartuni ilaasortaq
Jane Petersen
/Maani

§ 37 naapertorlugu apeqqut nr. 2012-175-imut akissut

Asasara Jane Petersen!

Inatsisartut 2011-imi upernaakkut oqaluuserisassani immikkoortoq 21-imut aalajangiinnermut Naalakkersuisut qanoq malitseqartitsisimanagerat pillugu apeqqutinnut qujanaq. Matuma kinguliani apeqqutit ataasiakkaat issuarneqarput, akissummik malitseqartinneqarlutik.

Apeqqut 1:

2011 upernaakkut ataatsimiinnermi aalajangiiffigisassatut siunnersuuteqareernerma kingorna (UPA 2011/40) 2011-imi ukiakkut ataatsimiinnermi isumaliutissiissut imatut qulequtalik Inatsisartunit akuersissutigineqarpoq:

"Illuni kikkunnit tamanit iserfigineqarsinnaasuni imaluunniit annertunerusumik sulisoqarfiutigisuni pisortat sanaartortitsinerini iluarsaassinikkullu suliaqarnerini (pisortat sanaartortitaat) sanaartornissamut aningaasaliissutit tamakkerlutik 25 mio. koruuninik qaffasinnerusunilluunniit nalillit minnerpaamik 1 %-iinik sanaartukkat silataatigut iluatigullu kusassarneqarnissaannut atugassanik Naalakkersuisut immikkoortitsisaqqullugit peqquneqarnissaat pillugu Inatsisartut aalajangiiffigisassaattut siunnersuut (UKA 2011/21)."

Aalajangiiffigisassatut siunnersuut qulaani issuarneqartoq piviusunngortinniarnera Naalakkersuisunit qanoq iliuseqarfigineqarpa?

Siunnersuutip 2011-mi ukiakkut ataatsimiinnermi oqaluuserisassaq UKA 2011/21-tut akuersissutigineqarnerata kingorna, aalajangiinnerup 2013-imut aningaasanut inatsimmut oqaasertaliussamik ilanngussinikkut atuuttussanngortinneqarnissaa Naalakkersuisunit siunertarineqarsimagaluarpoq.

Kisiannili 2013-imut aningaasanut inatsimmut siunnersuutip piareersarneqarnerani paasineqarpoq, taamatut suleriaaseqarnissaq arlalinnik pissuteqartumik naapertuutinngitsaq. Allaffissornikkut aningaasanut inatsimmut oqaasertaliussat amerlassutsimikkut killilersorniarneqarnerat tassunga ilaatinneqarpoq.

Siunnersuutip 2011-mi upernaakkut ataatsimiinnermi (UPA 2011/40) siullermeerneqarnerani Naalakkersuisut akissuteqaataat innersuussutigineqarpoq. Tassani ilaatigut allassimavoq, siunnersuutip aningaasanut inatsimmi oqaasertaliussat ilanngunneqarnissaa anguniarneqartoq.

28-08-2012
Sagsnr. 2012-071936
Dok. Nr. 999428

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

Apeqquut 2:

Inatsisartut Suleriaasiat § 33, imm. 5 naapertorlugu Inatsisartut aalajangiiffigisassaattut siunnersuut Inatsisartunit akuersissutigineqarpat Inatsisartut inatsisissaattut siunnersuuterpiatut saqqummiunneqarnermigut imaluunniit nalunaarutinnorlugu atuutilersinneqarnermigut piaartumik atuutilersinniarnissaa Naalakkersuisut pisussaaffigissavaat.

Pisussaaffitsik qulaani pineqartoq naammassiniarlugu Naalakkersuisut qanoq iliuseqalersaarpat?

Aningaasanut inatsimmut oqaasertaliussamik ilanngussinissamut – apeqquutinnut siullermut akissummi oqaatigineqartutut – taarsiullugu, kaajallaasitamik, Namminersorlutik Oqartussat iluanni sanaartornermut oqartussaasunut sammitinneqartumik kaajallaasitaliornissaq Naalakkersuisut siunertaraat. Kaajallaasitami ilaatigut kusasaanissamut qanoq iliorluni qanorlu amerlatigisunik aningaasanik illuartsisoqartassanersoq allassimassaaq, taamatullu tamatumunnga atatillugu isiginiagassanik malittarisassiornissaq pisariaqalersinnaavoq, taakkununnga assersuutigalugu sulianut piginnaaneqartunik siunnersorteqarnissap pisussaaffiunissaa ilaalluni.

Apeqquut 3:***UKA 2011/21-imi Inatsisartut aalajangersaanerat qaqugu Naalakkersuisunit timitalerneqarluni piviusunngortinneqarsinnaanera naatsorsuutigineqarpa?***

Kaajallaasitap apeqquutivit aappaannut akissummi taaneqartup ukiup naannginnerani nassiussuunneqarsinnaanissaa Naalakkersuisut naatsorsuutigaat.

Neriuppunga akissutikka naammagisimassagitit.

Inussiarnersumik inuulluaqqusillunga

Jens B. Frederiksen